



ODBOJKAŠKI SAVEZ BOSNE I HERCEGOVINE  
VOLLEYBALL FEDERATION OF BOSNIA AND HERZEGOVINA  
*Affiliated in FIVB*



**P R A V I L N I K**  
**O ODBOJKAŠKIM SUDIJAMA I KONTROLORIMA SUĐENJA U**  
**ODBOJKAŠKOM SAVEZU BOSNE I HERCEGOVINE**

Sarajevo, juni 2019. godine

Na osnovu člana 44. i 45. Zakona o sportu u Bosni i Hercegovini („Slubeni glasnik BiH, broj 27/08) i člana 30. Statuta OS BiH, Upravni odbor OS BiH na sjednici održanoj 31.05.2017. godine i 20.06.2019. godine, donio je

## P R A V I L N I K

o odbojkaškim sudijma i kontrolorima suđenja u Odbojkaškom savezu Bosne i Hercegovine

### I - OPŠTE ODREDBE

#### Član 1.

Ovim pravilnikom se reguliše sticanje uslova, prava, obaveza i odgovornosti i nadležnosti u provođenju odredbi Zakona o sportu BiH koje se odnose na stručne poslove suđenja, kontrole i unapređenja suđenja u odbojkaškom sportu.

#### Član 2.

Stručni poslovi suđenja, kontrole i unapređenja suđenja u odbojkaškom sportu su poslovi sudija, kontrolora suđenja i Komisije za sudijska pitanja OS BiH i stručnih tijela koja se bave tim poslovima.

### II - SUDIJSKA ZVANJA-RANGOVI U OS BiH

#### Član 3.

Odbojkaški sudija je lice koje posjeduje adekvatno znanje, sposobnost i kvalifikacije za suđenje odbojkaških utakmica.

Zvanične odbojkaške utakmice u OS BiH, mogu suditi samo lica sa zvanjem odbojkaški sudija, odnosno lica koja su položila ispit za sticanje zvanja odbojkaškog sudije, koja imaju licencu nadležnog saveza i koja se nalaze na nekoj od sudijskih lista.

#### Član 4.

U okviru OS BiH utvrđuje se postojanje 6 rangova (sudijskih zvanja) sudija i to 3 domaća ranga (I, II, III) i 3 međunarodna ranga (IV, V, VI). Ovi rangovi su sljedeći:

DOMAĆI

- I : sudija

- II : regionalni sudija / republički sudija

- III : državni sudija / savezni sudija
- MEĐUNARODNI
- IV : kandidat za međunarodnog sudiju
  - V : međunarodni sudija
  - VI : FIVB sudija

### III - STICANJE SUDIJSKIH ZVANJA

#### Član 5.

Zvanje odbojkaškog sudije stiče se pred nadležnom stručnom komisijom za polaganje sudijskih ispita. Ispit se sastoji od teoretskog i praktičnog dijela.

Kandidati mogu pristupiti polaganju praktičnog dijela ispita samo ako su prethodno položili teoretski dio iz poznavanja Pravila igre.

Praktični dio ispita obuhvata:

- Suđenje utakmice kao prvi sudija,
- Suđenje utakmice kao drugi sudija,
- Vođenje utakmice kao zapisničar i pomoćni zapisničar,
- Suđenje utakmice kao linijski sudija.

Zvanje odbojkaškog sudije se ne može steći prije 16 (šesnaest) navršenih godina starosti, dok se teoretski dio ispita može polagati i sa navršenih 14 (četnaest) godina starosti.

#### Član 6.

Stručni sudijski organi OS F BiH i OS RS formiraju Komisiju za polaganje sudijskih ispita i donose Propise kojima utvrđuju administrativnu proceduru, postupak i organizaciju polaganja sudijskih ispita, kao i proglašenje sudija u sudijska zvanja I, II i III ranga.

Članovi komisije moraju imati najmanje rang savezni/državni sudija.

#### Član 7.

Sudija koji se upućuje od strane OS BiH na kurs za sticanje zvanja kandidata za međunarodnog odbojkaškog sudiju (IV rang), mora ispunjavati sljedeće uslove:

- da se nalazi na listi najvišeg ranga takmičenja u OS BiH,
- da je u posljednjih 5 godina najmanje 3 godine prijavljen FIVB,
- da u period u kome je na listi za stalna takmičenja OS BiH prosječan plasman nije ispod 2/3 liste,
- da je na dan polaganja ispita mlađi od 41 godine života,
- da poznaje vođenje međunarodnog elektronskog zapisnika,

- da tečno govori i piše engleski jezik, što potvrđuje sertifikatom nadležne ustanove koji ne smije biti stariji od 2 godine ili testiranjem pred ovlaštenim stručnjakom za engleski jezik.

U slučaju da veći broj sudija ispunjava uslove iz stava 1., prednost se daje bolje plasiranom sudiji, ako je plasman isti daje se starijem sudiji.

#### Član 8.

Komisija za sudijska pitanja OS BiH na kraju svake kalendarske godine utvrđuje listu kandidata, na osnovu koje UO OS BiH predlaže sudije koje su ispunile uslove za upućivanje na kurs za kandidate za međunarodne sudije u narednoj godini.

#### Član 9.

Ukoliko u jednoj sezoni više sudija stekne uslove za listu kandidata za međunarodnog sudiju, prednost za upućivanje na kurs ima sudija koji je bolje plasiran u posljednje dvije takmičarske sezone i koji se prvi put upućuje na kurs.

#### Član 10.

Sudija koji se nalazi na listi kandidata gubi status kandidata i briše se sa liste ukoliko na kraju sezone ispadne sa liste, a po povratku na listu mora ponovo ispuniti sve uslove iz Pravilnika u cijelosti.

Ukoliko i po drugi put ispadne sa liste, gubi status kandidata trajno.

#### Član 11.

Ako sudija koji se po redosljedu upućuje na kurs, iz opravdanih razloga odustane od kursa zadržava svoj status i mjesto na listi, a umjesto njega upućuje se naredni kandidat.

U ponovljenom slučaju, sudija gubi svoj status i mjesto na listi.

#### Član 12.

Sudija koji po drugi put izgubi status kandidata na osnovu prethodnog člana, ne može više steći taj status.

#### Član 13.

Na zahtjev odbojkaškog sudije koji je pozvan na kurs za kandidata za međunarodnog odbojkaškog sudiju, Upravni odbor OS BiH može odlučiti da mu se pruži finansijska pomoć.

Negativan uspjeh na kursu povlači za sobom povrat sume uplaćene na ime finansijske pomoći u roku od mjesec dana od dana završetka kursa.

#### Član 14.

Kandidat koji se upućuje na kurs dužan je položiti preliminarni test prije zvanične prijave na kurs.

#### Član 15.

Uslovi za sticanje V i VI ranga definisani su propisima FIVB.

### IV - PREVOĐENJE U DUŽNOST KONTROLORA SUĐENJA

#### Član 16.

Kontrolor suđenja je lice koje posjeduje adekvatno znanje, iskustvo i kvalifikacije za ocjenjivanje suđenja na odbojkaškim utakmicama.

Kontrolu i ocjenjivanje suđenja na zvaničnim utakmicama može obavljati samo lice koje se nalazi na nekoj od lista kontrolora suđenja.

#### Član 17.

Zvanje (status) kontrolora suđenja može steći odbojkaški sudija najmanje trećeg stepena, koji nadležnom sudijskom organu OS F BiH ili OS RS podnese zahtjev za prevođenje u status kontrolora i koji ispunjava propisane uslove.

#### Član 18.

U dužnost kontrolora može se prevesti sudija koji je najmanje 5 godina uspješno sudio utakmice najvišeg ranga takmičenja u OS BiH, OS F BiH i OS RS.

Na osnovu rang liste kontrolora i na prijedlog entitetskih saveza, kontrolori mogu preći na listu stalnih takmičenja OS BiH.

Sudija koji je na kraju takmičarske sezone ispao sa liste stalnih takmičenja OS BiH, a ispunjava propisane uslove da bude preveden u kontrolora, može biti uvršten samo na sljedeću nižu listu u odnosu na onu sa koje je ispao, bez obzira na rang koji ima.

#### Član 19.

Godina u kojoj sudija ispadne sa liste, ne broji se u zbirne godine potrebne za prevođenje u kontrolora.

#### Član 20.

Sudija koji dva puta ispadne sa iste liste suđenja, ne može obavljati dužnost kontrolora na toj i višoj listi u narednih 5 godina.

#### Član 21.

Kontrolor može obavljati kontrolu suđenja do 65 godina starosti.

Ako prije početka takmičarske sezone nije navršio 65 godina, kontrolu suđenja može obavljati do kraja te sezone.

#### Član 22.

Bliže propise o prevođenju sudija u kontrolore suđenja donose nadležni sudijski organi OS F BiH i OS RS.

### V - FORMIRANJE LISTA SUDIJA I KONTROLORA

#### Član 23.

Službenu dužnost na zvaničnim takmičenjima u organizaciji OS F BiH i OS RS mogu obavljati sudije i kontrolori koji ispunjavaju propisane uslove i koje određuju nadležni organi tih saveza.

#### Član 24.

Službenu dužnost na zvaničnim takmičenjima u organizaciji OS BiH mogu obavljati sudije i kontrolori koji se nalaze na listama sudija i kontrolora suđenja stalnih takmičenja OS BiH.

#### Član 25.

Na listama sudija i kontrolora stalnih takmičenja OS BiH mogu se nalaziti sudije i kontrolori koji imaju najmanje savezni/državni rang i najviše jedan Međunarodni sudija iz drugih država koji se nalazi na privremenom radu sa random dozvolom u BiH.

Sudije koje se prvi put predlažu na listu službenih lica za stalna takmičenja OS BiH, moraju provesti najmanje 5 (pet) godina u zvanju/rangu državni/savezni sudija i najmanje 3 (tri) godine na listi za najviši rang takmičenja u OS F BiH i OS RS.

Kontrolori koji se prvi put predlažu na listu službenih lica za stalna takmičenja OS BiH, moraju provesti najmanje 10 (deset) godina u zvanju/rangu državni/savezni sudija i nakon toga najmanje 4 (četiri) godine na listi kontrolora u najvišem rang takmičenja u OS F BiH i OS RS.

U sezoni koja prethodi formiranju liste službenih lica za stalna takmičenja OS BiH, sudije i kontrolori moraju biti najbolje plasirani na konačnoj rang listi sudija i kontrolora u OS F BiH i OS RS i ispunjavati sve uslove iz ovog Pravilnika.

Izuzetak su sudije koje su u najvišem rang takmičenja sa navršenih 55 godina, sa prosječnim plasmanom u protekle 3 (tri) godine među 12 najbolje

rangiranih, koji uz saglasnost matičnog entitetskog saveza mogu biti prevedeni u zvanje kontrolora i angažovani na listi kontrolora za stalna takmičenja OS BiH.

Sudije i kontrolori na listama za stalna takmičenja OS BiH moraju ispunjavati uslove predviđene Zakonom o sportu u BiH.

#### Član 26.

U istom rangu takmičenja na listi službenih lica ne mogu se nalaziti sudija i kontrolor koji su u bliskim rodbinskim vezama, koje mogu imati uticaja na napredovanje ili zadržavanje na listi i na regularnost takmičenja.

Bliskim srodnicima u smislu prethodnog stava smatraju se:

- Srodnici u prvoj liniji krvnog srodstva.
- Srodnici u pobočnoj liniji zaključno sa trećim stepenom.
- Srodnici u prvom stepenu tazbinskog odnosa.

#### Član 27.

Liste sudija i kontrolora stalnih takmičenja OS BiH predlažu OS F BiH i OS RS, a usvaja Upravni odbor OS BiH za svaku takmičarsku sezonu najkasnije do kraja juna.

Prijedlog se dostavlja na obrascu koji je sastavni dio ovog pravilnika.

#### Član 28.

Odlukom Upravnog odbora OS BiH utvrđuje se lista službenih lica za stalna takmičenja u organizaciji OS BiH na paritetnom osnovu iz OS RS i OS F BiH.

Paritetni osnov zadržava se za svaku takmičarsku sezonu.

#### Član 29.

Po završetku takmičarske sezone, Komisija za sudijska pitanja OS BiH na osnovu prijedloga Podkomisije za kontrolu i unapređenje suđenja objavljuje jedinstvenu, konačnu rang listu sudija stalnih takmičenja OS BiH.

Sa konačne rang liste sudija stalnih takmičenja OS BiH ispadaju po jedan najlošije plasirani sudija iz OS F BiH i OS RS.

Kriteriji za rangiranje kontrolora utvrdiće se posebnim aktom.

#### Član 30.

Upravni odbor OS BiH imenuje Komisiju za rangiranje kontrolora od 3 (tri) člana sa zvanjem najmanje državni/savezni sudija.

Nakon završetka svih utakmica stalnih takmičenja u OS BiH, a najkasnije u roku od 10 dana Komisija za rangiranje kontrolora OS BiH na

osnovu Kriterija za rangiranje kontrolora obavlja njihovo rangiranje i dostavlja direktoru takmičenja OS BiH konačnu rang listu kontrolora za stalna takmičenja u OS BiH.

Po završetku takmičarske sezone, direktor takmičenja OS BiH na osnovu Kriterija za rangiranje delegata-kontrolora objavljuje jedinstvenu konačnu rang listu delegata-kontrolora stalnih takmičenja OS BiH.

Sa konačne rang liste delegata-kontrolora stalnih takmičenja OS BiH ispada po jedan najlošije plasirani delegat-kontrolor iz OS FBiH i OS RS.

#### Član 31.

U prijedlogu lista za narednu takmičarsku sezonu ne mogu se nalaziti sudije i kontrolori koji su u predhodnoj takmičarskoj sezoni ispali sa liste sudija i kontrolora stalnih takmičenja OS BiH.

#### Član 32.

Odbojkaški savez F BiH i OS RS zadržavaju pravo da u prijedlogu liste sudija i kontrolora stalnih takmičenja OS BiH za svaku narednu takmičarsku sezonu ne uvrste one sudije i kontrolore koji ne ispunjavaju propisane obaveze u tim savezima (obavezna edukacija, prisustvo seminarima sudija i kontrolora, poštivanje kodeksa ponašanja i akata OS BiH, OS F BiH i OS RS, izvršavanje finansijskih obaveza i neaktivnost u organizaciji i funkcionisanju sudijske i odbojkaške organizacije u cjelini), bez obzira na činjenicu što su svojim plasmanom na konačnoj rang listi sudija i delegata-kontrolora stalnih takmičenja OS BiH ostvarili to pravo.

U tom slučaju, razlozi iz predhodnog stava moraju biti činjenično obrazloženi i dokazani uz prijedlog liste.

#### Član 33.

Sudijsku dužnost sudija može obavljati do navršenih 55 godina života.

Ako prije početka takmičarske sezone nije navršio 55 godina suđenje može obavljati do kraja te sezone.

Sudije koji se prvi prvi put predlažu za listu sudija stalnih takmičenja OS BiH ne mogu biti stariji od 37 godina.

Odredba iz prethodnog stava se ne odnosi na odbojkaše/ice koji su bili licencirani za takmičenje u Premijer ligi BiH u sezonama nakon navršenih 35 godina.



#### Član 34.

U istoj takmičarskoj sezoni sudija ne može istovremeno obavljati dužnost sudije i kontrolora na listama stalnih takmičenja OS BiH.

#### Član 35.

Ako sudija ili kontrolor dva puta ispadne sa liste službenih lica za stalna takmičenja OS BiH isti ne može biti predložen na tu listu u naredne tri godine.

Ako i nakon povratka na listu službenih lica za stalna takmičenja OS BiH, sudija ili kontrolor ispadne sa liste nema više pravo povratka na tu listu.

#### Član 36.

Ukoliko u toku takmičarske sezone sudija svojom krivicom ne ispuni predviđenu kvotu suđenja, smatraće se da je ispao sa liste sudija stalnih takmičenja OS BiH i u narednoj sezoni ne može obavljati dužnost sudije na sudijskoj listi stalnih takmičenja OS BiH.

Ukoliko sudija ne ispuni predviđenu kvotu suđenja iz objektivnih razloga, na kraju sezone ostaje na listi kao nerangiran.

#### Član 37.

Ukoliko sudija ili kontrolor zatraži mirovanje staža iz opravdanih razloga (trudnoća, porođaj, bolest, školovanje, službeni odlazak u inostranstvo i privremeno preseljenje u drugu državu) zadržava pravo da po prestanku razloga za mirovanjem staža bude vraćen na listu stalnih takmičenja OS BiH.

Zahtjev za mirovanje staža podnosi se u pisanom obliku sa priloženim dokumentima koji su dokaz činjenica iz stava 1 ovog člana.

Ako mirovanje staža traje duže od dvije takmičarske sezone, sudija ili kontrolor mora početi sa jedan stepen nižeg ranga takmičenja.

Ako mirovanje staža traje duže od tri takmičarske sezone, sudija ili kontrolor mora početi sa najnižeg ranga takmičenja.

Sudiju ili kontrolora kojem miruje staž, na listi zamjenjuje sudija ili kontrolor iz istog regionalnog saveza.

O mirovanju staža odlučuje UO OS BiH na prijedlog Komisije za sudijska pitanja OS BiH u toku formiranja lista službenih lica.

#### Član 38.

Sudija koji sudeći utakmicu napravi takvu povredu Pravila igre zbog koje se mora igrati nova utakmica, automatski se skida sa sudijske liste stalnih takmičenja OS BiH.

Tumačenje povrede Pravila igre iz predhodnog stava daje Komisija za sudijska pitanja OS BiH.

#### Član 39.

Sudije i kontrolori sa liste za stalna takmičenja OS BiH mogu obavljati službenu dužnost u nižem rangu takmičenja, drugim sportovima i savezima samo u onim kolima redovnih takmičenja u kojima nisu delegirani od strane Vrhovnog sudije ili direktora takmičenja OS BiH.

Izuzetno kontrolori mogu obavljati službenu dužnost u istom kolu, u nižem rangu takmičenja kada je obavljanje dužnosti povezano na istom putnom pravcu uz naplatu takse.

### VI - DELEGIRANJE SUDIJA I DELEGATA- KONTROLORA

#### Član 40.

Delegiranje sudija obavljaju nadležne vrhovne sudije.

#### Član 41.

Vrhovni sudija OS BiH obavlja delegiranje sudija za:

- stalna takmičenja u organizaciji OS BiH (Premijer liga BiH, završnica takmičenja za Kup BiH i finalna takmičenja mlađih kategorija).
- zvanična prijateljska takmičenja reprezentacija BiH (u zemlji).
- zvanična međunarodna prijateljska takmičenja klubova (u zemlji).

Vrhovni sudija OS BiH može obavljati delegiranje sudija koji se nalaze na sudijskim listama OS BiH.

#### Član 42.

Vrhovne sudije (OS F BiH i OS RS) obavljaju delegiranje sudija za:

- stalna takmičenja u organizaciji tih saveza.
- zvanična prijateljska takmičenja u organizaciji klubova članova OS F BiH i OS RS
- na teritoriji na kojoj djeluje taj savez.
- zvanična prijateljska takmičenja reprezentacija BiH i zvanična međunarodna prijateljska takmičenja klubova koji se igraju na teritoriji na kojoj djeluje taj savez (linijske sudije, zapisničare i pomoćnike zapisničara na zahtjev Vrhovnog sudije OS BiH).

#### Član 43.

Delegiranje linijskih sudija, zapisničara i pomoćnika zapisničara za sva stalna takmičenja u OS BiH, OS F BiH i OS RS obavljaju osnovne sudijske organizacije (sudijski odbori ili druge sudijske organizacije) prema teritorijalnoj nadležnosti.

#### Član 44.

Sudije i kontrolori prije početka takmičenja, nakon objavljivanja Kalendara takmičenja, mogu pisanim putem zahtjevati od vrhovnog sudije OS BiH (sudije) i direktora takmičenja OS BiH (kontrolori) da budu oslobođeni obavljanja službene dužnosti u pojedinim kolima radi obavljanja privatnih poslova.

U toku takmičarske sezone, a nakon obavljenog delegiranja, ovim zahtjevima će se udovoljiti samo u slučaju bolesti, vandrednih poslovnih obaveza i drugih opravdanih razloga koje su pravdali dokumentacijom.

#### Član 45.

Delegiranje delegata-kontrolora obavljaju nadležni organi koji provode takmičenja (direktori takmičenja).

#### Član 46.

Direktor takmičenja OS BiH obavljaju delegiranje delegata-kontrolora za:

- stalna takmičenja u organizaciji OS BiH.
- zvanična međunarodna takmičenja klubova u evropskim kupovima (tehnički delegate CEV).
- zvanična prijateljska takmičenja reprezentacija BiH (u zemlji).
- zvanična međunarodna prijateljska takmičenja klubova (u zemlji).

Direktor takmičenja OS BiH može obavljati delegiranje delegata-kontrolora koji se nalaze na sudijskim listama OS BiH te angažovati specijalnog posmatrača koji će ocijeniti rad kontrolora.

#### Član 47.

Direktori takmičenja OS F BiH i OS RS obavljaju delegiranje delegata-kontrolora za sva takmičenja u organizaciji tih saveza.

## II - STICANJE PRAVA NA LICENCU

#### Član 48.

Odbojkaške sudije i kontrolori su stručna lica u odbojkaškom sportu u BiH, koja moraju imati licencu za obavljanje službenih dužnosti izdatu od nadležnog odbojkaškog saveza u BiH.

#### Član 49.

Da bi sudija ili kontrolor dobio licencu OS BiH za obavljanje službenih dužnosti na takmičenjima u organizaciji OS BiH, neophodno je da ispunjava i sljedeće posebne uslove:

- da ima sudijsko zvanje-rang „SAVEZNI“/“DRŽAVNI“ sudija i više,
- da je od strane OS F BiH i OS RS predložen na listu sudija ili kontrolora OS BiH,
- da je odlukom Upravnog odbora OS BiH uvršten na listu sudija ili kontrolora OS BiH,
- da je prisustvovao seminaru za sudije i kontrolore u organizaciji Komisije za sudijska pitanja OS BiH.

Odlukom o stavljanju na listu sudija i kontrolora stiču pravo na licencu.

#### Član 50.

Bliže propise za izdavanje licenci sudija i kontrolora za takmičenja u organizaciji OS F BiH i OS RS donose nadležni stručni sudijski organi tih saveza.

Propisi iz prethodnog stava ovog člana ne mogu biti u suprotnosti sa odredbama ovog pravilnika.

#### Član 51.

Sudijama i kontrolorima za liste OS F BiH i OS RS licence izdaju i obrasce propisuju nadležni stručni sudijski organi tih saveza. Ako je objedinjena dužnost delegata i kontrolora, licence moraju potvrditi-ovjeriti organi koji rukovode takmičenjima.

#### Član 52.

Licence sudija i kontrolora važe za takmičarsku sezonu za koju su izdate i ovjerene.

Licenca se oduzima automatski u slučajevima grubog kršenja Zvaničnih pravila igre, Kodeksa ponašanja u OS BiH i neopravdanog odsustva sa seminara sudija i kontrolora.

Donošenje takve odluke je obavezno, a donose je organi koji su licencu izdali.

#### Član 53.

Po žalbi na odluku iz prethodnog člana, odlučuje Upravni odbor OS BiH, odnosno nadležni organ OS F BiH i OS RS ako se radi o službenim licima sa liste za stalna takmičenja tih saveza.

## VIII – NAKNADE SLUŽBENIM LICIMA

### Član 54.

Odbojkaške sudije i delegati-kontrolori (službena lica) za obavljanje svojih dužnosti na zvaničnim utakmicama, imaju pravo na novčanu naknadu-taksu, putne i druge troškove i dnevnice, na osnovu propozicija određenog takmičenja.

U toku jednog dana, sudije ne mogu suditi više od dvije zvanične (prvenstvene ili Kup) utakmice.

### Član 55.

Organizator utakmice obavezan je da službenim licima isplati sudijske takse i druge troškove u skladu sa važećim propozicijama.

### Član 56.

Taksa za prvog i drugog sudiju i kontrolora je ista na svim utakmicama istog ranga takmičenja.

Taksa linijskih sudija, zapisničara i pomoćnika zapisničara je ista na svim utakmicama istog ranga.

### Član 57.

Visina taksi utvrđuje se najmanje 15 dana prije početka takmičarske sezone.

### Član 58.

Visina takse za zvanična prijateljska takmičenja na kojima učestvuju domaći ili inostrani klubovi/reprezentacije, iznosi 70% od takse za ligu u kojoj se takmiči domaćin takmičenja.

### Član 59.

Za zvanične i prijateljske utakmice reprezentacija BiH i sve utakmice na zvaničnim i prijateljskim međunarodnim turnirima koje organizuje OS BiH službena lica obavljaju poslove volonterski uz obavezu OS BiH ili tehničkog organizatora da obezbjedi prevoz, a u prostorijama dvorane osvježavajuće napitke i ishranu u skladu sa regulacijama CEV-a i Odlukom o naknadama službenim licima.

### Član 60.

Ako se utakmica ne odigra iz bilo kog razloga a službena lica dođu na utakmicu, organizator je dužan isplatiti sve troškove predviđene propozicijama, kao i 50% predviđene takse.

Za utakmicu koja je započeta i iz bilo kog razloga prekinuta, službenim licima pripada puni iznos predviđene takse.

#### Član 61.

Ukoliko se utakmica igra radnim danom, kontroloru, prvom i drugom sudiji pripada naknada za izgubljeno radno vrijeme u visini 30% iznosa takse.

Ukoliko se utakmica igra radnim danom zbog promjene termina radi nastupa kluba u međunarodnim takmičenjima, nastupa odbojkaša/ica za reprezentaciju BiH i nastupa klubova na međunarodnim utakmicama i tradicionalnim turnirima, za čije učešće postoji saglasnost nadležnog takmičarskog organa uvećanje takse iz stava 1. ovog člana neće se primjenjivati.

#### Član 62.

Putni i drugi troškovi i dnevnice službenih lica isplaćuju se u skladu sa važećim propozicijama.

#### Član 63.

Dnevnice službenim licima obračunavaju se na osnovu stvarnog vremena provedenog na putu.

Visina dnevnice je ona koja je utvrđena Odlukom o putnim troškovima u OS BiH.

### IX - FINANSIJSKE OBAVEZE SUDIJA I KONTROLORA

#### Član 64.

Radi finansiranja troškova službenih lica sa liste stalnih takmičenja OS BiH, obavezna su iznos od 10% od naplaćene takse uplaćivati na žiro račun OS BiH. Ova sredstva se posebno evidentiraju i sa njima raspolaže Komisija za sudijska pitanja OS BiH.

Uplata se obavlja najkasnije do 5-og u mjesecu za prethodni mjesec, direktno na žiro račun OS BiH.

#### Član 65.

Ostale finansijske obaveze sudija i kontrolora suđenja, propisuju nadležni sudijski organi OS RS i OS F BiH.

## X - PRELAZNE ODREDBE

### Član 66.

Komisija za sudijska pitanja OS BiH utvrdit će oblik i sadržaj evidencija koje će voditi kancelarija OS BiH o listama službenih lica po takmičarskim sezonama, o konačnim rang listama nakon završetka takmičarske sezone, mirovanju staža i oduzimanju licence.

### Član 67.

Nadležni organi OS F BiH i OS RS dužni su donijeti svoje propise u skladu sa ovim pravilnikom u roku od 30 dana od dana usvajanja ovog Pravilnika.

### Član 68.

Tumačenje Pravilnika daje UO OS BiH.

### Član 69.

Pravilnik stupa na snagu danom donošenja.

### Član 70.

Stupanjem na snagu ovog pravilnika prestaje da važi Pravilnik o odbojkaškim sudijama i kontrolorima suđenja u Odbojkaškom savezu Bosne i Hercegovine objavljen pod brojem: 01/1-378/17 od 31.05.2017. godine.

Broj: 01/1-333-1/19

Datum, 20.06.2019. godine

PREDSJEDNIK

Fatić Alija s.r.